

أحزان صديقة

أحزان صديقة

شعر

شيماء القصبي

تصميم الغلاف: أحمد نرج

رقم الإيداع: 2015/3065

I.S.B.N: 978-977-488-367-5

دار اكتب للنشر والتوزيع



الإدارة: 10 ش عبد الهادي الطحان من ش الشيخ منصور،

المرج الغربية، القاهرة.

المدير العام: يحيى هاشم

هاتف: 01144552557 – 01147633268

E – mail: daroktab1@yahoo.com

Facebook: دار اكتب للنشر والتوزيع

الطبعة الأولى ، 2015م

جميع الحقوق محفوظة ©

دار اكتب للنشر والتوزيع

أحزان صديقة

شيماء القصبي

شعر



دار اكتب للنشر والتوزيع

للدنيا اللي شربت مننا كتير

وخفنا عليها من الإمتلاء

لولادي حبايبي

ولكل صحابي...

بحبكم على فكرة

شيماء القصبي

مش كل صمت يبقى خوف...
ولاً احترام
ولا كل فجر بيتشبك من طرف نوره
ولا شرط ع الليل الظلام
أوقات لقانا بيتحسب على إنه فرض
وساعات كتير بيكون حرام

مش بالنيّات.....

كان نفسي أصلح م الماضي

بس الماضي فات

وعشان كده مش همشي بضهري

هتكلم عن بُكرة الآتي

وهعيشه بكيفي وحكاياتي

ولا هعمل للناس حسابات

من صغري حلمت أكون شاعر

أو لقطة ف فيلم رومانسي قديم

أو غنوة

مليانة مشاعر

ولإن انا مجنون بالفطرة

فجأة انا غيرت اتجاهاتي
وظلعت حاجات x حاجات x حاجات
ملهاش دعوة بكل حاجاتي
ولان انا هفضل مجنون
وجنوني له برضو أصول
همسح كل ده م الماضي وامشي
ومادام ماشيين آخرتها وصول
من غير ما نشيل هم المسافات
ومادام عاشقين مش هخجل اقول
أصل الإحساس مش بالنيات

خِص الطرِيق من أوله..
وآخره بداية
يا نعيش على الخوف م الفراق
يا نكمّله
بكل انتمائنا للحكاية

بسيطة...

لو حاسس شيء في قلبك

لا بد تطلّعه

مين ضامن يبجي بُكرة

ويشوفه ويسمعه

كانت الأحلام حقيقة

واصحابها ف وقت ضيقة

قلعوها ودمّعوا

.....

لو ضاع منك صديقك

وطريقك ودّعهُ

في زحام أو لحظة طائشة

جت مش ف وقتها
أو كلمة سمعها منك
ولا عمرك قلتها
دور عليه ف حاجاته
تلاقيه وترجعه

.....

وان جالك مرة قلبك
بلع ريقه وقالك
أنا مضطر اوجعك
والفرح هشمعه
متخافش وسيئه.. عادي
في الدنيا دي ناس كثير
بالجرح استمتعوا
وان فكر يوم يذلك
مد ايديك واخلعه

قامت من ع الأرض بسرعة
علشان تخبط راسها بقوة في ظهر الحيلة
حتى الحيلة...
مديالها الوش الخلفي

أحزان صديقة

لحظة دخول المرحلة الثانية.. خيوط

متلعبكة ومربية جدا

أعقد كثير م المرحلة السابقة

زهقت التحدي وافضل أموت

في لقطة جريئة في نص المسابقة

برغم اني بملك شوية سكوت

هيقدر يخرجني منها واعيش

إلى مَنْ عارفني

وهوّا حقيقي ميعرفنيش

أنا محض خوف

شوية ظروف

باشوف الحقيقة وبعمل ماشوفتش

عشان رافضة اشوف

بفكر واقّرر واضيّع وادور

في نفس الدقيقة

والاقي المواجه تُقف لي صفوف

فــــ بحزن وبافرح واغني واثور

في لقطة بريئة

وامثل لوحدني في ميت ألف دور

في نفس المسلسل ..

"أحزان صديقة"

ذهب الفجر وطلع الليل
والعصفور راح فين
كان من غلبه شايِل ضِلُّه
بيعرج على جناحين
وامّا قالوله نفّض روحك واسهر فيك
وابلع ريق السما يشفيك
بص لفوق
علق رمشه على نجمين
ونزل يسرق آخر نفسُه وقال :بعدين
بعدين

م الآخـر.....

يعيش الخلق في المتاهات
إلى الساعة
ويبقى الصبر مش موجود
لدى الباعة
ويبقى الحب للجاهل بقيمة الحب
وتبقى الفُرقَة للعاشقين
ويفضل فرحنا اشاعة
لا تتعجب على حالنا ولا تخزن
كده الدنيا بلا راحة
وآدم م البداية تاه
وتوّهنا
عشان قطعة لتفاحة

مش شرط كل الكلام لو ينكتب ع السطر

إنك تحسّه.. تفهمه... أو فيه تروح

عمر الرصيف ما راح يبوح للقطر

مهما اتخنىق م الناس

أو مهما كان مجروح

آخر نقطتين في الكاس ...



ماشي على الناي بالهزيمة

إتهزم

في الصورة والمعنى

إتهزم في الليل

ساعة أوائه

واتهزم في الحب

وكل شيء عيط عشائه

وانتصر في الشّعر

لجل الشّعر

و لجل قلبه ما..

يفضل مكانه

مين اللي قال
الأصل في الحب الفراق
الفراق في الحب لعنة..
زي ما قال الحبيب
وان صاب في مرّة
ألف مرّة راح يخيب

اتجاه واحد...رایج بس

بيغيب ساعات شكل اللقا عتّا
ونغيب عليه فينسانا
وتروح صورتنا من على وش الأغاني
فنتكسر
كده الدنيا وبرغم ده بتمر
فما تبصش على الحزن اللي دوّنا في فنجانه
في هذا الوقت تحديدًا
ولا تُجزم يان الفرح رايح جاي
وإنه هيبجي تأكيدًا

اللي يفوئته النور
الليل ما بيسيبهوش
والحظ لو بالدور
كان برضو ملحقوش

رسالة من تحت الباب...

مساء الخير / صباح الخير
وآسف برضو عـ الإزعاج
أنا واحد ما تعرفهوش
وكل اما امشي تحت البيت
بسمع مزيكا وصوت دافي
بيشيل الحمل على كتافي
وكلام تاني ما بفهمهوش
أنا أحاسيسي كانت شغالة
بس خسارة
وقعت وانا صغير على قلبي ف نص الليل
ودا خلاني ما احسش حد
بس بجد
أنا حسيتك

مش تمثيل
قلت اكتبك ده ف رسالة
علشان وانا راجع في طريقي
أبعثالك تحت الباب
هوّا انت عندك أصحاب؟!
أنا عارف إنه فضول مني
بس أنا حبيتك على فكرة
من مازيكتك
من ألحانك
حتى جنانك وانت بتضحك
من أحلامك
أحلامك الباصة من الشباك
وبتقسم نفسها نُصَيْن
نُص الليلة ونُص لُبْكَرَة
شفت..
انا حبيتك بالعشرة

ولذلك أنا حابب أقولك

شكراً جداً

على كل المتعة اللي انا فيها

لاكن عندي سؤال قبلها

من شقين

إنت سعيد كده؟ ولا حزين؟!

ويلاً هشفّر الواقع وادخن زهر

واوعى يا بحر ما تقوليش

على اللي جاي

طريق ملعون.....

هعمل كإني ماليش ودان
وماليش عيون
وانتوا استمروا في العجين
الكف فاسدة والعجين مسموم
والتهاون في العبث
درب احترام
مش — الجنون
أنا برضو ماشية ف سكتي
وانتوا استمروا في العبث
لن توصلوا
هذا الطريق ملعون

سکرات التوت....

ومتكليس في أفكاره
وعارف إنها نهايته
وشايف روحه فوق سكة آخرها الموت
لاكن لساته بيغني
وماشي ف سكتة مبسوط
بيحكى ف قصة مجروحة
ويرسم صورة للصبار على اللوحة
ويكتب فوقها
"شجر التوت"
صبغ روحه بأفكاره ..
وصبح يعمل لها ملكووت

كلام الليل ما يتقالشي

إلا على بابُه

ولا يعرف جلال الليل

إلا هم.. اصحابُه

حاجات بتمشي لوحدها...!

— مالك خير..؟

- أنا لو صادفت مرة ونمت

بصحي بلاقي

كل الناس اللي انا عارفاهم

مش عارفيني

— إزاي يعني..!

فقدوا الإحساس مثلاً بيكي

أو إنتي الـ.....

- استنى يا دكتور انت ظالمني

كل حاجاتي انا مش لاقياها

صوت الناي على باب الأوضة

والكلمة اللي ماهيش مقصودة

طلعت عفواً لحظة صدق

والوردة اللي فـ ورقى آياها
مش لاقياها
كراسة الرسم وألواني
بصة عيني لروحي زمان
وانا عاجباني
واصحابي اللي معاهم بس
بقايل نفسي/ياشوف/وبجسّ
والشوق البايث ع الترايزة من امبارح
والكرسي بتاع اللي مقالشي..
إنه رايح
واهو مرجعشي لحد الوقتي
والسرّ اللي انا شلته ف قلبي
واللي لحد الآن
متقالشي
والغنة اللي كانت شغالة
متعودة أسمعها ليلاي

كل حاجاتي
مش لاقياهم
جمعا جمعا
واللي انا متأكدة منه طبعاً
ان انا مش عيانة أكيد
نفسي ف دوا ويكون فعال
قبل ما انا هديه للبال
اللي مطالشي
للناس اللي قعدت معاهم
ولكل كلامنا اللي اتقال
والمهتمة كمان انا بيهم
وحاجاتنا الحلوة اللي يتمشي
علشان لما اصحى
ألاقيهم

قسمُ لو تعلمون _ عظیم ...

بربّ الشّعْر والكلمة على لساني
ما تفتكروا ان انا الجاني
ولازم تعرفوا إني..
احترمت الذكرى للآخر
وإن الليل مالوش رجلين
وهذا الشوق مالوش آخر
وإني كنت بحترم الألم والخوف
واداري الشمعة من عين اللي مش شايفين
عشان تضوي
ولجل ما اشوف
واقْدَس مبدأ العشاق
واخبي آخر السّكة

عشان مكتبش عـ القصة

نهاية /

فراق

يا بني هنيالك دي السكة مسدودة

والقلب لسه جبان

والحسرة موجودة

قولّي انت ليه زعلان؟!

ما الدنيا اهي سوودة!

منتهى اللذة.....

عند اصطدام اللّذة في ساعة الوصول

بالإنهاء

هتلاقيني

مش هخبي لهفقي لبداية تانية

فـ بابتدي

وبعبي روعي وشوقي فيك

جوايا ليك

قصة وقصيدة

وكلمة هامسالك بشوق

إوعى عن قلبي تغيب

أربعة وثلاثين سنة.....

إهداء للمترو

اللي راح ورجع ميت مرة وموصلنيش

معرفش ليه

جه ف بالي يومها

الكدايين والمدهونين قشرة

سفّاحين الشّعر

وأعداء الطريق والحمرا عينهم،

في اللي بينهم

تاهايت سكتي صدفه وكرهتهم جدا.

في أنصاف الموجودين

وفي اللي وجودهم زوّد وحدتي وحدة

في الغيطان اللي قلعت خضارها بكل ارادتها

عشان تلبس التوب...

الصغير أوي عليها

...

معرفش ليه

جه ف بالي فجأة

تخبط المترو على باب تلفونى ف نص الليل

قبل ما يشقُّ طريقه

وقبل ما _صدفة_ يعيش

وكإني بداية ونهاية بيتفائل بيهم

في الآخر راح ..

ورجع ميت مرة

وما وصلنيش

....

معرفش ليه

جه ف بالي برضو،،

كل اللي نسيوني ومنسيتهومش

كل اللي حبيتهم وحبوني

لاكن مجال احساسنا بالحب ده
كان أضيق من إننا نتفرد جواه
فانكمشنا حتى مُتنا
والنهارده..

يقتى ليا من تاريخ يوم الحياة _ الافتراضي _
(أربعة وتلاتين سنة)
عمري أنا ..

عدى وساب ع القلب
ورقة محدش شافها
وعلى الحلم حاجات
وعلى الصُبح الفُرقة
وماهيش فارقة
أنا هفضل أحلم واستنى
وف ذكرى ميلادى اللـ جاي
هكتب نص جديد
(خمسة وتلاتين سنة)

في الضلّمة تقدر تشوف سرب النجوم لامعة

فكرت إيه آخرتك.. لو تبتدي بدمعة؟

إعمل طريقك للسؤال ده مداس

الفرحة يا صاحبي..

دي بتيجي ع السُمة

أم فرحة.....

لسة شايقة الدمع صاحي

جوه منديل "ام فرحة"

وبرغم ده

كل المصاير جوه عينها

عروسة حلوة

لابسة طرحة

عايشة لسه اليوم بيومُه

بتتشر الليل ع الغسيل

جل ما تنشف همومُه

أو تعدّل من مسارها

لسه حب الأرض دي

بيجري في روحها

جوه دارها
بين عيالها وصوت قدّرها
رغم كل العجز لساها بتمشي
لا بتعب
لا هتعب
أو تقول للموجة عدّي.. هيا مالها!
لسه عايشة وعاززة تفضل
حتى تأتي الأرض وتلمّ فـ عزالها

هنا نبدأ
في هذي اللحظة تحديداً
وهيّا ف يوم من الآتي
هتصحى الصبح من نومها
وهتفرّق على قلوب العباد قصّة
بتحكينا

وان احنا هنا مشينا
هنا دُشنا على الماضي
هنا آمنا بأن السّكة لو لنا
هيخضع كل ما فيها لخطوتنا
لذا قررنا من جوّه
نكون إحنا...
وإحنا بكل ما فينا

تناقض سخيؑ....

ما بين الرصيف
وبين ناس بتمشي
وشائلة همومها في قلب الرغيف
تناقض سخيف
ما بين اللي راكب
وبين اللي قاعد في سرّه وباكي
ما بين اللي راضي وبين اللي شاكي
وبين ناس بتجري على أكل غيرها
وموظف نضيف
ما بين اللي بايع وبين اللي شاري
وبين اللي جاهل وبين اللي قاري
ما بين اللي عايش ومقتول في قلبه
وبين اللي مَيّت ولاكنّه عايش

ما بين الشهيد وواحد حرامي وواحد جبان

ما بين المطاطي وبين اللي خان

وراجل شريف

تناقض سخيف

وانا جاية اقولك

ما بيني وبينك تناقض سخيف

لسه لامحاني ف عيونك

صافية جدا

عن مرآة مشوشاني

لسّه بقصد اسمك اسمك

في القصائد والأغاني

معجزة.....

كان اللُّقا في المسا
وفي المسا بالذات
فكان كأول لقا
غرقانة بيه الحكايات
رغم اننا قلنا:
(العودة للماضي جنون)
ولو / وامتي / واذا
مش مكتوبالها حياة
ولا حتى ذكرى ولون
فـ لكل قلب خُطاه
منهج وليه مدرسة
هذا اللقا بالذات
حقيقي كان معجزة
وبرغم هذا حصل
وبرضو كان في المسا

عليهم.....سلامًا

سلامًا ع اللي قال انا جاي
برغم ان انت ماعزمتوش
سلامًا ع اللي قال شكرًا
عشان الدنيا ماديتيهوش
وكلمة "هات" عشيق أبدي
وكلمة "خُد" ما بتحبوش

.....

سلامًا ع اللي مات مكتوف
علي اللي حتى وقت الموت
ماكانش ف موته حرية
على الأصحاب في وقت الجد

على اللي كنت محتاجهم في لحظة خوف
ولما اتحججوا بظروف
فما لقيتشي في كتفك حد
سلامًا ع اللي عاتبته
وخد هذا العتاب بالصوت
فأيقنا بأن البعد..

مالوش دية
سلامًا ع اللي كان ليا
وما أخذتوش
عشان أصلا ما كان ليا
على المشهد إذا "غيم"
فحككم حُكم "ناقص شوف"

.....

سلامًا ع الكابوتشينو في عز البرد
إذا شربته و إذا سبته..
وفجأة اتكب !! فما شربتوش

على اللي كنا عارفينه وطلع أصلا
ما عندوش قلب
على كل اللي معترفين بفضل الحصن في السكة
وعـ البصة اللي مرتبكة
في عينها لما قتلها:
"وحشتيني"
علي قلبين قد افترقوا وبينهم وعد
"يتلاقوا"
علي كل اللي داقوا الحب
وعـ اللي كل ما داقوا
علي الذكرى اللي مانسيتهاش
وعـ العمر اللي راح ببلاش
وعـ الفرح اللي قال هاجي ولسه ماجاش
لكن عارفه انه ما بيكدبش
وواقعة كما في أخلاقه

براءة الحلم من حقي
ما انا اللي حلمت واتبهدلت
وانا اللي نمت من تعبتي

عن الشاعرة

.....

الاسم: شيماء عبد العزيز محمد القصبي
شاعرة عامية وكاتبة أدب طنس
عضو اتحاد كتاب مصر
عضو عامل بقصر ثقافة المنصورة
حاصلة على جائزة الساقية التشجيعية لعام 2009م (مركز ثالث)
عن ديوان "الساعة صفر"
الجانزة الأدبية المركزية عن هيئة قصور الثقافة (أفضل ديوان) عن
ديوان شوية بحر لعام 2012
صدر لها :
ديوان "الساعة صفر" عن دار أكتب للنشر والتوزيع / 2009
ديوان سهوة سادة/ عن دار أكتب 2011
ديوان شوية بحر/ عن الهيئة العامة لقصور الثقافة 2012
تحت الطبع:
"جديتي وكرسي الحكايات" مجموعة قصصية للطفل
للتواصل :

Shima.qasaby@yahoo.com